

Këyítfii Pool bín Bu-teeraa Filiipda Wo'eencii lëgís Këyítfiida

Këyítfii fii fëri Pool bín kerceencaa ga teeraa Filiipda. Pool ga baawaagari wukanakwa jangatta Hewhewii winéwí'wii ga teeraama bi bo' biyewin daama gëmussa ga Yéesu. (Tumeen 16: 11-40). Ga waa Pool lagu ga kasu ndaga lëgëyii Ha'mudii, bu-teeraa Filiip nëgírohussa kopa'. Ba wossa bo' gaba, ya teeku Epaforodít kibayi' Pool iñaa ba nëgíro-hda. Pool bínnda këyítfii fii ga jamaanaama kigërëmfa, ee ba ínoh ban an ya hotin iñaa ba tumfa. Ya daassaba ban kiyëgís gík ga ngë-maagaba, ba watuk kitaabuk buwaa jëgírohi iñaa taabohhii na iñaa Kooh nakohda. Ee fodaama ba en wínoo na Koohda, ba enatda wínoo ga díkaantiiba ban.

Këyítfii Pool bín bu-teeraa Filiipda tíidoh anee:

- 1 - Këñdoh (1: 1-2)
- 2 - Pool gërëm Kooh ga kerceencaa ga teeraa Filiipda (1: 3-11)
- 3 - Kipes fodii Kiristaanii (1: 12-30)
- 4 - Pool daas kerceencaa ga Filiipda kiyóoskí' hafba fodii Kiristaanii (2: 1-18)
- 5 - Pool wo' na bu-teeraa Filiip ga loo Tímotée na Epaforodít (2: 19-30)
- 6 - Kiheel kinebloh Kooh Këri laak solu (3: 1-4: 9)

7 - Pool gërëmmba bu-Filiip (4: 10-20)

8 - Taŋkoh (4: 21-23)

Këñdoh

¹ Mi Pool na Tímotée, dí, sùrgacii Yéesu Kiristaa, dí bërí bínndúu kèyítfi fii, dú béébpúu dú bii dú en buu Kooh, dú dèk teerum Filiip ee dú en wínoo na Yéesu Kiristaada; dú na buwum kuliyuk ga jaangiida na bii amdohba ga lègèyiida. ² Mi yii kíim Kooh Paamudiigaruu, ya na Yéesu Kiristaa Ha'mudiigaruu, ba barkeellúu, ba onndúu jam.

Pool gërëm Kooh ga kerceencaa ga teeraa Filiip

³ Saycaa heliigoo ka' garúu tóoh, mi gërëm Koohyii mi gëmda. ⁴ Ee saycaa mi kíimi'túu Kooh tóoh, mi taabi ga na keeñ wisóosí', ⁵ ndaga dú amdohinndoo dijóffí' ga kiyéegaloh Hewhewii winéwí'wii, aboh ga besaa dú aas ga ngëmiida bi ga wati. ⁶ Iníi yii wóorinndoo: Kooh, yii dalin kitum lègèyii wijóffí' wii wiima ga dhuycúuda haywa kitumi bi ga daa wa matan ga bëríinaa Yéesu Kiristaa haysanda. ⁷ Binaa dú béébpúu, mi halaat ínuma garúuna, mi èldohhii ndaga mi ekinndúu ga keeñiigoo. En ki'ena, dú abin ga lègèyii Kooh sassoo kitumda, ee dú béébpúu dú hotin kijofkiigari ya laak garuuda. Dú bii tumka, hídaa dii mi en ga kasuda, ee dú bii tumka ga dii mi lebiroh kituuki' Hewhewii winéwí'wii, mi yaa jangatwa ga daa mi wëñ kimínda. ⁸ Ehee! Béébpúu, mi waarinndúu lool fodii

dii Yéesu Kiristaa waa'tuuda. Ee iñaama Kooh ínohin an kayoh. ⁹ Ínii yíi, yéí mi kíimi'túu Kooh: Mi kíim kiwaarohkii en ga keeñjúuda wěñ kiyak, aaw fíkíi, dú wěñ ki'ínoh kayoh-kayohda, ee dú mín ki'ínohsoh iña en tóoh. ¹⁰ Fodaama, dú hay kimín ki'ínoh iña gènda, doonaa bēríinaa Kiristaanii hayisanda, dú en fibo' bisetí', ee ken laakoo iña ya wo'an garúu yibóní'. ¹¹ Kipeskiigarúu, kooroh ga Yéesu Kiristaa, ka líif na tumeen cijúwí', caa ndaman Kooh ee ca kañiri.

Kipes fodii Kiristaanii

¹² Mbokcii, mi waa' dú ínoh an ínii dallooda nam ki'on Hewhewii winéwí'wii kibaat kisíw. ¹³ Karin sah bi béeb soldaa'cii watuki kaanfii gúwernēe'da na béeb buwii bíinoo ínohuunun diima an kisúrga'uk ga Kiristaanii tah mi lagu ga kasu. ¹⁴ Ee ínii wěñ kiyewin ga mbokkerceenciida, daa ba hotee an mi laguunun ga kasu, ba wěñnja ki'am Ha'mudii, ee iñaama baattaba fít bi ba bii yéegaloh wo'eenii Kooh ee ba niikoo dara ga. ¹⁵ Laakin gaba nak ee kayoh, buwaa en na kijangat ga teekii Kiristaanii ee ki'ínaadohhoo na kiheel nookoh ekba ga. Bíinoo nak, bii jangat ee ba tumka na keeñ wisetí'. ¹⁶ 'Buwii mi mēeñjoh kiwo' bii taabu ga na kiwaaroh. 'Ba ínohin an Kooh yéí sassoo kilebiroh kituuki' Hewhewii winéwí'wii. ¹⁷ 'Buwii mi dēb kiwo'da nak, enndii keeñ wisetí' ekba ga, wayee ba heel kinookoh doj. 'Ba halaat fodaama kibaattoo coonu ga dii mi en ga kasuda. ¹⁸ Íñaama ba tum ga helbada, waa wa jof, waa wa joffii tóoh,

dara bíttiiroo ga! Iñii laak soluda wërí en an Kiristaanii yii yéegalohu; mi yii nebluk ga ee mi hay da kiweñ kinebluk ga.

¹⁹ En ki'ena, wóorinndoo híl an iñcii mi dayda onanndoo kimúc ndaga kíimcii dú kíimdíroo Koohda na ban amdohii Helii Yéesu Kiristaa amdohirooda. ²⁰ Mi abin yaakaa' wiyëgísí' an mi kaci'anndii múk ga fíkíi Kooh. Hanaa kay, ennda diimada ee bi taa', waa mi kaan waa mi pes, mi laakan hel widëlí', ee fodaama mi hay kiteewoh kiyakkii ndamii Kiristaanii ga béeb kipeskiigoo. ²¹ En ki'ena, mi ga kihaffoo, Kiristaanii en kipeskiigoo ee kikaan baatanndoo hen. ²² Ee en lak mi lís kipesaa, mi mín kibaat kilaak jeriñ, kon mi jom ya kitanuk? ²³ Mi nak, mi laak hel kanak: mi waarin kimeyoh ga kipeskii kii, mi ennee na Kiristaa. Iñaama yëri gën garoo fúuf. ²⁴ Wayee iña wëñ kilaak soluda wërí en mi tes ga ëldúna ndaga dú. ²⁵ Iñaama wóorinndoo ee mi ínohin an mi hay kites, mi en narúu dú béebpúu ki'amdohhúu doonaa dú aaw fíkíi ga ngëmii, ee keeñjúu soos ga ngëmii dú laakda. ²⁶ Fodaama, binaa mi hayis garúunaa, dú hay kibaat kindamukoh Yéesu Kiristaa ndaga mi. ²⁷ Ga iña mín kilaak tooh, pesat fodii dii Hewhewii winéwí'wii wo' ga loo Kiristaa nakoh kada. En danaa, waa mi hayyúu kiwaaknee, waa mi en diliis tooh, mi hay kimín kikeloh an dú bokin hel ee dú bokin fit wínoo kilebiroh kituuki' ngëmii Hewhewii winéwí'wii haydohda. ²⁸ Mi hay kikeloh ban an dú niikoo búwii heñohirúuda. Iñaama nak

hayba kiteeb an ba aaw ga kisaŋku'uk, teeβba ban an dŭ, dŭ aaw ga kimúc. Ee iñaama meyoh ga Kooh. ²⁹ En ki'ena, Kooh yeri onndúu, eembii rek ga kigem ga Kiristaanii, wayee bi ga kitook kisodalu ndaga Kiristaanii. ³⁰ Fodaama, dŭ naroo, dŭ beri bok lebirii, wa wiinoo ee wa weri dŭ hotee mi lebirohee kudewaa ee weri dŭ keloh mi lis lebiroh.

2

Kiristaanii yóoskídin hafci, Kooh bëwí'tari

¹ Man enii dŭ en wiinoo na Kiristaaniida deldin helluu ga tooh, kiwaa'kii ya waa'tuuda daasin keenjoo ee Helii yisela'iyii oninnduu kitaaboh, yaa en beeb waa' mooroomci, laak yermaandi gari. ² Kon juwohat ga dikaantiruu, dŭ waaroh, dŭ bok hel, dŭ bok halaat. En danaa, keenjoo soos seb. ³ Kaa tumat dara kiheel kikuliyuk bimooroombuu wala kiheel ndamaa enndii tús, wayee namat haffuu kiyóoski' hen, baa en beeb tik mooroomci daa paafin daa ya tik hafcida. ⁴ Kaa eemat rek ga kiheel iña gën garuu, yaa en beeb halaatat ga iña gën ga mooroomci ban. ⁵ Bayat badukeenaa man na waa Yeesu Kiristaa tee-weerúuda.

⁶ Ya mos ki'en Kooh wayee ya mosoo kinookuk kihin na Kooh.

⁷ Wayee ya nammba kifoñ na kihafci tooh iña ya laakeeda, ya tummba hafci surga.

Ya mannda na buwii, ee baa hotti tooh, inoh an ya bay faan bo'-súusúus.

- 8 Ya yóoskí'ta hafci, ya teewohha kikelohi' Kooh bi ga kikaan, kikaan sah ga ku-raanaa.
- 9 Kërí tah, Kooh bëwí'tari, ya hanohha béeb dook, ya e'tari teek waa wëñ kiyak teekoo teek.
- 10 En ðanaa, ga teekii Yéesu Kiristaa, béeb bok kiyí' ga fíkíici, ennda ga asamaan, ennda ga kakayfii, ennda ga fíldoo kakayfii,
- 11 ee yaa en béeb meydoh ga kúuwci an Yéesu Kiristaa yërí en Ha'mudii. Fodaama, Kooh, Paamudii laak Ndam.

Sasii kerceencii

- 12 Kon nak, dú bii mi keeñukinda, dú bii saycaa en tooh dú kelohdeeraroo, ga waa mi en narúuda, wëñattoo kikelohi' wati, hídaa ga dii mi enissii narúuda tooh. Lëgëyat kiteewoh an dú múcin, taam na kiniik Kooh, na ki'e'ti cée' wiyaak. 13 En ki'ena, Kooh yërí lëgëyi ga ðuuycúu, ki'onndúu kimín kiwaa' na kitum iña taaboh na iñii ya natda. 14 Iña dú tum tooh nak, kaa taabat ga na kicapatuk wala kiña'sukoh. 15 En ðanaa, dú laakoo sík, dú set wic, dú en bitowu Kooh taa laakoo dara iña bo' wo'an gaba yibóni' ee dú kindohsoo ga buwii ga ëldúna júwussii ee ba bibo' bibóni'da. 16 Dú jom kimelic ga ðuuy buwii fodii dii olcii melici ga asamaanda, dú haydohi'ba Wo'eenii onohi kipesda. Binaa dú tum iñaamanaa, mi hayyúu kimín kindamukoh, bëríinaa Kiristaanii hayisanda. Ee iñaama hay kiteewoh an iñii mi dayda na iñcii mi sonda enndii sooy. 17 Luu enee an mi apsan hen, ñífiigoo aamuk

doonaa ngëmii d'ú laak ga Koohda mat, ee mi man na anah waa akitohu na sarah waa tumdu Kooh, mi neblukin ga iñaama ee mi nebluk ga narúu d'ú béebpúu. ¹⁸ Dú ban, neblukat fodaama ee d'ú bok naroo kinebluk.

Pool wo' na bu-teeraa Filiip ga loo Tímotée na Epaforodít

¹⁹ Mi abin yaakaa' kiwosohhúu Tímotée ga iña maañandii, neñ Yéesu, Ha'mudiinaa. En danaa helloo mín kidal ga iña ya yahhoo kibéestí' ga loorúuda. ²⁰ Enndii Tímotéena, mi laakoo ken dii baa bok naroo kibítuk na kihalaati garúu. ²¹ Bii tesda toohba, hafba wēñba kibít loo Yéesu Kiristaa. ²² Dú ga kihaffúu, d'ú inohin an Tímotée teewohin dii ya hín ki'am bi yégísín ga légēyii kiyéegaloh Hewhewii winéwí'wii ee ya taabin naroo ga fodii kowu na paamci. ²³ Kon, yērí mi am yaakaa' kiwossi garúu, mi laaki iña lee'too ga iñii mi enukohdanaa. ²⁴ Ee mi abin yaakaa' wiyégísí' an Ha'mudii hayyoo ki'on, mi hayyúu kiwaaknee, mi ban, ga iña maañandii.

²⁵ Mi abin an mi jominndúu kiwosohis Epaforodít, mbok-kerceeniigaruu, yii mi bok nari ga légēyii na lebirii kiyéegaloh Hewhewii winéwí'wii, ee d'ú woseeri garoo kihaydohi'too iña mi dímalukohanda. ²⁶ Ya waarin lool kihotissúu d'ú béebpúu ee dii d'ú kelohin an ya d'úukoolee henda, bítinndi bi hēpin. ²⁷ En ki'ena, ya d'úukooleera bi ya deeyca kikaan. Wayee, Kooh laakka yērmaandi gari. Ee ya yērēmbiiri haŋci doŋ, wayee bi ga mi ban, doonaa keeñjoo leehoo lool. ²⁸ Kērí tah,

mi wosohhúuri ga iñaa wěñ kigaaw doonaa d'ú hottinaa keeñnjúu soos ee mi ga kihaffoo helloo mín kidal. ²⁹ Kon binaa ya hayaa, toputu'atti na keeñ wisóosí' ee d'ú abohhi fodii mbok-kerceen ga Ha'mudii. 'Buwum fodum garida d'ú jominba ki'e' cée'. ³⁰ Tesee ga jutuut ya kaan ndaga kilégëyi' Kiristaanii tahka, ee ya tooneera kumuunkaagari ga wii ya haydohi'-too dímalaa, d'ú ga kihaffúu, d'ú minéeriíroowa kihaydohi'da.

3

Ki'ínoh Yéesu Kiristaa kéri laak solu

¹ Ee diimada mbokcii, neblukat ga enii d'ú en wíinoo na Ha'mudiida. Kiwo'issúu iñaama ga bín enndii coonu garoo, ee garúu, iñaama yéri wěñ kiwóo'. ² Watukat haffúu ga baay-baaycii*, ga fuwiima jégírohi sabohda na bii gítínohi an kigúruk bok ga kijaamuk Koohda. ³ En ki'ena, d'ú, d'ú béri tum kigúrukkii kukay-ohkii, enndiiba. Du jaamuki Kooh, kooroh ga Heliigari ee d'ú ndamukohi Yéesu Kiristaa. Du líkkii yaakaa'tuu ga bo'-súusúus. ⁴ Moona déy, mi ban mi míneera kilík yaakaa'too ga fodaama. En an laakin baa foon an ya mín kilík yaakaa'cii ga bo'aa, mi jommbika kiwěñ kimín. ⁵ Mi gúru ga besaa wiyitnakaahaywaa mi límohuda. Mi bok ga heetii Isarayeel, ga níilaa Beesamee. Mi iñii Ebërée ee mi kowu Ebërée. En ga loo kitaabuk Waasii

* **3:2** 3: 2 Yaawúu'caa baysee fuwaa enndii yaawúu'da baay-baay. Pool, dii, íkba wo'eenaama ga dii ba béri cal kibayu fodaamada

Móyíisaa, mi enee Fërisiyeen̄. ⁶ Mi kaantukohēe ga hen bi mi ennda kihatal kerceencii ga kipesba. En ga loo kitaabuk iñii Waasii Móyíis nakohdanaa, laakéeríi dara iñaa mi deen̄ ga, mi taabukeewa hen ga tooh. ⁷ Mi abee an iñcaama laakdinndoo jeriñ, wayee diimada, mi hotohca sooy ndaga Yéesu Kiristaa. ⁸ Ee sah eembii ga iñcuma doṅ. Iñaa en béeb̄ mi abohhi sooy ndaga iñii wēñ kijof ga tooh ee wëri en ki'ínoh Yéesu Kiristaa Ha'mudiigooda. Ya yëri tah mi foñin tooh. Iñcaama toohca, mi aaminca caluus doonaa mi mín kilaak Kiristaanii, ⁹ ee mi en wínoo nari bi en sejis. Mi séentukissii ki'en bo' yijúwí', kooroh ga kitaabuk Waasii Móyíis: kigēm ga Kiristaanii kërí onndoo kijúb. Kijúb meyoḥ ga Kooh ee Kooh oniwa baa gēm gari. ¹⁰ Iñii mi waa' ga keeñjooda wëri en ki'ínoh Kiristaanii, mi ínoh doolaa mílísí'ti ga buwaa kaaninda, mi day coonucaa ya dayda, mi man nari bi ga kikaankaagari. ¹¹ En dānaa, mi mín kiyaakaa' kimílís ga buwaa kaaninda.

Kifool aaw dile'aa'daa

¹² Mi wo''ii an mi foolin bi ga dile'aa'dii haat, wala an mi laakissii sík. Wayee nak mi yii lís kifool doonaa mi mín kilaas neehalaa, ndaga mi ga kihaffoo, Yéesu Kiristaa laasinndoo kumēeñí'. ¹³ Mbokcii, mi fooṅngii múk an mi laasinwa niip. Enaama yínoo doṅ yëri bíttoo wati: mi nísín ga helloo iñaa paafinda, mi yii ēewrukka ga iñii hay ga fikíida. ¹⁴ Fodaama, mi yii lís kifool bi mi

le' daa mi laasohan neehalaa Kooh faani'tuu ga asamaan ee ya bayohhuu ga hafci, kooroh ga Yéesu Kiristaada. ¹⁵ Kon béebpuu, du bii du laakissii síkda, du bokat halaat ga iñuma. Wayee laak buwaa bay halaataa wóotíroh na iñumanaa, Kooh ga kihafci hayyúuwa kiléerí'. ¹⁶ Daa ka mín ki'en tóoh, du lisat kitaabuk waasii du abee bi ga watida.

¹⁷ Mbokcii, béebpúu tumat fodiigoo! Dí teewinndúu daa jom ki'enda. Kon yípat has-súu ga buwii taabuk iñaa dí teewoh yaama. ¹⁸ En ki'ena, mi yewininndúuka kiwo', ee mi yii wo'issúuka bi mi yii koduk ga sah: yewinin buwaa sagoh na kikeloh iñaa aaw ga loo kikaankaa Kiristaa ga kuraanaada. ¹⁹ Buwiima yah kiméeñjoh ga kisañku', ndaga lookciigaba cēri ba tum Koohyiigaba, ba ndamukoh iñcii jomeeba ki'ap kacida ee ba lík helba ga enaama öldúna doŋ. ²⁰ Du nak, du bok ga bu-asamaan ee du bii sek Yéesu Kiristaa, Ha'mudiigaruu meyoh asamaan hayyuu kimúsal. ²¹ Binaa ya hayisaa, ya hay kisúpít faanfigaruu laakoo doolida, fa man na faanfigari laakin ndamda, kooroh ga doolaagari tah iñaa en tóoh tooki'tarida.

4

Iñcii Pool dígal bu-Filiipda

¹ Kon, dú mbokciigoo mi keeñukda, mi doorukinndúu bi hēpin. Dú bēri sóosí' keeñjoo ee mi ndamukohirúu. Kon, dú filiimunciigoo, dēkat ki'am bi yēgís ga Ha'mudii fo-daama. ² Fu Ewodí, na fu Sintiiik, bokat

halaat d'ú en wínoo ga Ha'mudii. ³ Fu ban, fu yii fu bok ki'am wínoo naroo ga lëgëyiida*, mi kíimmbaa, amfohaa beticum banak buma. En ki'ena, ba taabin naroo ga lebirii kiyéegaloh Hewhewii winéwí'wii, mi na Kilimaa na buwii bíinoo taabu naroo ga lëgëyii ee Kooh bídin teekcaagaba ga këyítfaa buwaa laak kipeskaa lehooda☆. ⁴ Dékat kinebluk ga ki'en wínoo na Ha'mudii. Mi wo'issúuka, neblukat! ⁵ Teewohat kijoffúu ga béeb ndaga kihayiskii Ha'mudii deeyin. ⁶ Kaa jaahli'at ga dara, wayee ga iñaa en tóoh, wo'at Kooh sooliciigarúu, d'ú kíimiri, d'ú dímalukiri ee ban d'ú gërëmiri. ⁷ Fodaama, jamii Kooh paafin kiñaan bo'-súusúusda hay kiní' keeñciigaruu na halaatciigaruu ca ewruk ga Yéesu Kiristaa.

⁸ Ee diimada mbokcii, iñii yii yëri mi wo''úu: líkat hellúu ga iñaa en kayoh, iñaa cal ki'e' céé', iñaa júwin, iñaa setin, iñaa calin kiwaa', iñaa bo' mínin kitook, iñaa jekin na iñaa calin kigërëm. ⁹ Kon, tumat iñaa d'ú yoodohhi garoo, iñaa d'ú bewoh garoo, iñaa d'ú keloh garoo na iñaa d'ú hot garooda. En danaa, Kooh yii onohi jamda, hay narúu kitaam.

Pool gërëm bu-Filiip ga iñcaa ba onndida

* **4:3** 4: 3 «Fu bok ki'am wínoo naroo ga lëgëyii»: Wo'eeni-ima ga lak kiGerek bídu fodii «Sysygos» mínin ban ki'en teek bo'-súusúus, Súusúgos. Ken ínohhoo ati Pool wo' na ba yaama, wala fodii rek bo' yiliis yaa mín ki'en tóoh ee bok nari ga lëgëyaa ya en na kitumda. ☆ **4:3** 4: 3 Malkat Ínohlukoh 3: 5.

10 Keeñjoo soosin lool ga Ha'mudii ga dii dú teewohin an dú foñin hellúu garooda. Mi ínohin an hellúu eneera ga wayee hal laakéeríi hen. 11 Enndii an mi laak sooli ga yen tah mi wo''úu iñuma. En ki'ena, iñii mi yoonða wèrí en an, waa mi laak yen, waa mi laakkii dara, keeñjoo soosin. 12 Mi mínin kipes ga kiñak, mi mínin kipes ga kilaak. Ga iñaa en tooh, ga daa en tooh, keeñjoo pookin ga kikap na kiyaaß, ga kiyéwini' na kijutuuti'. 13 Mi mínin kitapukoh na coonufaa en tooh ndaga doolii Kiristaanii onirooda. 14 Daa ka mín kiman tooh, dú tumin yijófi' ga dii dú tuukukinndoo ga coonucii mi enukohða. 15 Dú ßu-Filiip, dú ga kihaffúu, dú ínohin gaka an, ga wii mi meyoh gohaa Maseduwaan ee lak mi han kidal kiyéegaloh Hewhewii winéwí'wiíða, laakkii jaangu wíinoo waa tookkoo ki'amdoh ga hëelís enndii wiirúu dogaa. 16 Ga wii mi en ga gohaa Tesaloníkða sah, dú wosohinndoo dímal kipay sooliciigoo ee enndii waas kíinoo doñ. 17 Enndii an mi heel kilaas dímal garúu, wayee mi heel Kooh barkeellúu ee neehalaagarúu wëñ kihoom. 18 Mi laasin ga tooh iñaa dú wosoheerooda ee sah wa hëpin. Dii en dii mi laakin tooh iñii mi soolukða ndaga Epaforodít haydohdínndoo iñcaa dú onohða. Iñcii dú onohða man garoo fodii nget cúuraay winéwí', sarah, waa Kooh tookin ee wa newinndi*. 19 Koohyiigoo nak laakin alalaa leehoo taa', waa teewoh ndamaagari, ee kooroh ga Yéesu

✧ 4:18 4: 18 Malkat Efees 5: 2.

Kiristaa, ya hay kipay sooliciigarúu béebca.
²⁰ Ndam aawat ga Kooh, Paamudiigaruu bi
taa'! Aameen.

Taṅkoh

²¹ Kēñí'dattoo béeb buwum enu buu Kooh
duma ee enu wiinoo na Yéesu Kiristaada.
Mbok-kerceencii enu naroo diida, bii kēñí'túu
ga. ²² Béeb buwii enu buu Kooh diida,
bii kēñí'túu ga, wēñaa ga bii lēgēyi' buu'
Sesaa'da☆. ²³ Mi yii Kíim Yéesu Kiristaa,
Ha'mudiigaruu ya barkeellúu béebpúu.

☆ **4:22** 4: 22 Mēdírohat na 1: 13.

**Hewhewii winéwí'wii Kooh Kifiliimunkii
ki'askii**

**Noon: Hewhewii winéwí'wii Kooh Kifiliimunkii
ki'askii New Testament**

copyright © 2012 Wycliffe Bible Translators, Inc.

Language: (Noon)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source
files dated 2 Jun 2022

7c1cfb93-c4c9-5127-ac22-ecb23adca870